

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", broj: 7/97 i 3/99 i "Službene novine Tuzlanskog kantona", broj: 13/99, 10/00, 14/02, 6/04 i 10/04, 05/11 i 02/12), na prijedlog Vlade Tuzlanskog kantona, Skupština Tuzlanskog kantona, na sjednici održanoj dana _____2024. godine, d o n o s i:

ZAKON O JAVNIM PRIREDBAMA

DIO PRVI - OPĆE ODREDBE

Član 1. (Predmet)

(1) Ovim Zakonom o javnim priredbama (u daljem tekstu: Zakon) uređuje se način organiziranja javne priredbe i drugog oblika okupljanja na području Tuzlanskog kantona (u daljem tekstu: Kanton).

(2) Drugim oblikom okupljanja iz stava (1) ovog člana ne smatra se mirno okupljanje koje se organizuje u skladu sa posebnim propisom o slobodi mirnog okupljanja.

Član 2. (Definicije)

Pojedini izrazi upotrijebljeni u ovom Zakonu imaju sljedeće značenje:

- a) "javna priredba" je priredba organizirana u skladu sa ovim Zakonom;
- b) "drugim oblikom okupljanja" u smislu ovog Zakona podrazumijeva se okupljanje kojem je svrha ostvarivanje privrednih, vjerskih, kulturnih, humanitarnih, sportskih, zabavnih i drugih interesa koji nemaju za cilj ostvarivanje prihoda, a koje nije uređeno posebnim propisom o mirnom okupljanju;
- c) "blizina objektima" je udaljenost 50 metara od objekata koji su propisani ovim Zakonom;
- d) "dodatne mjere osiguranja" su mjere koje poduzima policijska stanica Uprave policije Ministarstva unutrašnjih poslova (u daljem tekstu: policijska stanica) na osiguranju javne priredbe koje su izvan redovnog vršenja policijskih poslova;
- e) "naročito opravdani razlozi" su razlozi koje organizator javne priredbe ne može predvidjeti u vrijeme organiziranja javne priredbe;
- f) "organizator" je pravno ili fizičko lice koje u skladu sa ovim Zakonom organizuje javnu priredbu;
- g) "rukovodilac javne priredbe" je lice koje vrši nadzor nad održavanjem javne priredbe i usmjerava rad redara;

h) "redar" je fizičko lice određeno od organizatora, koje je u obavezi štititi sigurnost učesnika javne priredbe te spriječiti uništavanje imovine koja se nalazi na prostoru na kojem se održava javna priredba;

i) "učesnik javne priredbe" su organizator javne priredbe, rukovodilac javne priredbe, redari i lica koja prisustvuju javnoj priredbi.

Član 3.

(Supsidijarna primjena Zakona o upravnom postupku)

U pitanjima koja nisu uređena ovim Zakonom supsidijarno se primjenjuje Zakon o upravnom postupku ("Službene novine F BiH", broj: 2/98, 48/99 i 61/22).

Član 4.

(Ravnopravnost spolova)

Gramatička terminologija u ovom Zakonu podrazumijeva uključivanje oba spola.

DIO DRUGI - JAVNA PRIREDBA

POGLAVLJE I. OPĆE ODREDBE

Član 5.

(Javna priredba)

(1) Javna priredba je okupljanje lica radi ostvarivanja prihoda u okviru registrovane djelatnosti koje, s obzirom na očekivan broj učesnika ili karakter održavanja, zahtijeva poduzimanje dodatnih mjera osiguranja.

(2) Javna priredba može se organizovati na otvorenom ili zatvorenom prostoru, namijenjenom ili pogodnom za njeno održavanje.

Član 6.

(Prostor za održavanje javne priredbe)

(1) Prostor za održavanje javne priredbe je mjesto koje je pristupačno i pogodno za okupljanje lica čiji broj i identitet nije unaprijed određen i na kojem okupljanje lica ne dovodi do ugrožavanja prava drugih lica, javnog morala, sigurnosti i zdravlja ljudi, sigurnosti imovine i ometanja javnog saobraćaja.

(2) Održavanje javne priredbe ne može se održati na sljedećim mjestima:

a) u blizini objekata bolnice ako ometa pristup vozilima hitne pomoći i remeti mir bolesnicima;

b) u blizini objekata spomenika kulture, ako bi to moglo prouzrokovati njihovo uništenje ili oštećenje;

c) na magistralnim, regionalnim i lokalnim putevima i saobraćajnicama na kojima se odvija šinski saobraćaj ukoliko se ugrožava nesmetano odvijanje saobraćaja;

d) u nacionalnim parkovima i zaštićenim parkovima prirode osim javnih priredbi koje imaju za cilj unapređenje i popularizaciju zaštite prirode i čovjekove okoline, kao i obilježavanja značajnih historijskih datuma i uz saglasnost upravitelja;

e) drugim mjestima na kojima postoji stvarna opasnost da bi održavanjem javne priredbe bila ugrožena sigurnost lica i imovine, narušen javni red i mir u većem obimu ili ozbiljnije ugrožavanje zdravlja ljudi i životne sredine.

POGLAVLJE II. PRIJAVA JAVNE PRIREDBE

Član 7.

(Prijava održavanja javne priredbe)

(1) Organizator javne priredbe (u daljem tekstu: organizator) dužan je podnijeti prijavu održavanja javne priredbe (u daljem tekstu: prijava).

(2) Prijava se podnosi nadležnoj policijskoj stanici na čijem području se održava javna priredba, odnosno Upravi policije ukoliko se javna priredba održava na području više policijskih stanica, najkasnije sedam dana prije početka održavanja.

(3) Prijava sadrži:

a) cilj, mjesto i vrijeme održavanja javne priredbe;

b) naziv i sjedište organizatora, lične podatke odgovornog lica, odnosno zastupnika ukoliko je organizator više pravnih lica te ime i prezime, adresa prebivališta, odnosno boravišta i jedinstveni matični broj ukoliko je organizator fizičko lice;

c) lične podatke o rukovodiocu javne priredbe sa brojem kontakt telefona i spisak redara sa njihovim ličnim podacima;

d) mjere osiguranja reda i mira koje će organizator poduzeti;

e) procjenu broja učesnika;

f) saglasnost upravitelja, odnosno vlasnika prostora na kojem se priredba održava;

g) druge podatke od interesa za sigurno i nesmetano održavanje javne priredbe.

(4) Javna priredba na putu ne smije se održavati bez odobrenja nadležne policijske uprave na čijem području se održava javna priredba, odnosno Uprave policije, ukoliko se javna priredba održava na području više policijskih uprava.

(5) Zahtjev za izdavanje odobrenja iz stava (4) ovog člana podnosi se najkasnije 15 dana prije održavanja javne priredbe.

(6) Odobrenje iz stava (4) ovog člana donosi se u skladu sa odredbama člana 162. do 169. Zakona o osnovama sigurnosti prometa na cestama u Bosni i Hercegovini ("Službeni glasnik BiH", broj: 6/06, 75/06, 44/07, 84/09, 48/10, 18/13, 8/17, 89/17 i 9/18).

(7) Obrazac prijave za održavanje javne priredbe, postupak rješavanja i donošenja rješenja o zabrani održavanja javne priredbe, propisat će se pravilnikom koji donosi ministar Ministarstva unutrašnjih poslova na prijedlog direktora Uprave policije Ministarstva unutrašnjih poslova TK, u roku od 90 dana od dana stupanja na snagu ovog Zakona.

(8) Ako se javna priredba održava na površini javnog puta, zbog čega bi saobraćaj bio obustavljen ili ometan, organizator je uz prijavu dužan priložiti i odobrenje nadležnog organa u skladu sa odredbama Zakona o osnovama sigurnosti saobraćaja na putevima u Bosni i Hercegovini ("Službeni glasnik BiH", broj: 06/06, 75/06, 44/07, 84/09, 48/10, 18/13, 08/17, 89/17 i 09/18).

Član 8.

(Procjena uslova za održavanje javne priredbe)

(1) Nadležna policijska stanica na osnovu podataka iz prijave i raspoloživih operativnih podataka procjenjuje da li su ispunjeni uslovi za sigurno održavanje javne priredbe.

(2) Na osnovu procjene iz stava (1) ovog člana organizatoru se može naložiti da poduzme dodatne mjere osiguranja u roku koji ne može biti kraći od 24 sata.

Član 9.

(Zabrana održavanja javne priredbe)

(1) Nadležna policijska uprava će rješenjem zabraniti održavanje javne priredbe ako:

a) nije pravovremeno i uredno prijavljena;

b) organizator ne provede naložene mjere iz člana 8. stav (2) ovog Zakona;

c) je prijavljena na prostoru na kojem se u skladu sa ovim Zakonom ne može održavati;

d) postoji stvarna opasnost da bi održavanjem javne priredbe bila ugrožena sigurnost i zdravlje ljudi, ugrožena imovina ili bi došlo do stvarne opasnosti od nasilja ili narušavanja javnog reda i mira u većem obimu;

e) su ciljevi nesporno usmjereni na kršenje ljudskih prava i sloboda ili zbog različitih nacionalnih, rasnih, vjerskih ili kulturnih osjećanja i pripadnosti mogu podstaknuti na nasilje;

f) je to potrebno radi sprečavanja ugrožavanja zdravlja ljudi, na zahtjev organa nadležnog za poslove zdravstva.

(2) Rješenje iz stava (1) ovog člana dostavlja se organizatoru najkasnije 48h sati prije početka održavanja javne priredbe.

Član 10. (Žalba na rješenje)

(1) Protiv rješenja iz člana 9. stav (1) ovog Zakona organizator javne priredbe može izjaviti žalbu Ministarstvu unutrašnjih poslova.

(2) Žalba izjavljena na rješenja iz stava (1) ovog člana ne odlaže izvršenje rješenja.

(3) Rješenje po žalbi se dostavlja organizatoru najkasnije u roku od 24 sata od prijema žalbe.

(4) Organizator je dužan odmah po prijemu rješenja kojim se zabranjuje održavanje javne priredbe obavijestiti javnost o tome i po mogućnosti ukloniti javno istaknuta obavještenja o njenom održavanju.

(5) Ukoliko ministar u utvrđenom roku ne odluči po žalbi, može se održati javna priredba.

(5) Protiv rješenja iz stava (3) ovog člana se može pokrenuti upravni spor kod Kantonalnog suda u Tuzli.

POGLAVLJE III. OBAVEZE

Član 11. (Organizator)

(1) Organizator je dužan:

- a) odrediti rukovodioca javne priredbe;
- b) osigurati red i mir na javnoj priredbi;
- c) odrediti i osigurati dovoljan broj redara na javnoj priredbi;
- d) poduzeti odgovarajuće mjere medicinske zaštite i zaštite od požara;
- e) omogućiti neometan prolazak vozilima policije, hitne pomoći i vatrogasnim vozilima.

(2) Organizator može obavljanje poslova na održavanju reda i mira povjeriti agenciji za osiguranje lica i imovine.

Član 12.
(Rukovodilac javne priredbe)

(1) Rukovodilac javne priredbe je dužan:

- a) poduzeti potrebne mjere radi osiguranja reda i mira na javnoj priredbi te vršiti nadzor i usmjeravati rad redara;
- b) prekinuti javnu priredbu ako nastupi stvarna opasnost za sigurnost učesnika javne priredbe i imovinu ili po izrečenoj naredbi policijskog službenika.

(2) Rukovodilac javne priredbe može nastaviti prekinutu javnu priredbu ako su u međuvremenu otklonjene okolnosti iz stava (2) tačke b) ovog člana.

Član 13.
(Redar)

(1) Redar je dužan:

- a) nadzirati ponašanje ostalih učesnika javne priredbe i usmjeravati kretanje učesnika na javnoj priredbi;
- b) odmah obavijestiti policijskog službenika o učesniku javne priredbe koji nosi oružje ili predmete pogodne za nanošenje povreda;
- c) zabraniti ulazak i obavijestiti policijskog službenika o učesniku javne priredbe koji je po njegovoj procjeni u alkoholiziranom stanju, nosi predmete pogodne za nanošenje povreda ili može narušiti red i mir na javnoj priredbi;
- d) policijskom službeniku pružiti podatke o licu koje je narušilo javni red i mir.

(2) Za vrijeme izvršavanja dužnosti iz stava (1) ovog člana redar obavezno nosi prsluk fluorescentne boje ili istaknutu vidljivu oznaku sa natpisom "redar".

Član 14.
(Obaveze policijskih službenika)

(1) Poslove održavanja javnog reda i mira na prostoru koji se neposredno nalazi uz mjesto održavanja javne priredbe vrše policijski službenici.

(2) Policijski službenici su dužni spriječiti ometanje ili onemogućavanje održavanja javne priredbe koja se održava u skladu sa odredbama ovog zakona.

POGLAVLJE IV. SPREČAVANJE ODRŽAVANJA JAVNE PRIREDBE I PREKID JAVNE PRIREDBE

Član 15.

(Sprečavanje i prekid javne priredbe)

(1) Policijski službenik je ovlašten da spriječi održavanje javne priredbe ako je njeno održavanje zabranjeno u skladu sa članom 9. stav (1) tačka b) i d).

(2) Policijski službenik je ovlašten da prekine javnu priredbu ako:

a) se učesnici pozivaju na rušenje ustavom utvrđenog poretka, pozivaju ili podstiču na oružani sukob ili nasilje, nacionalnu, vjersku, rasnu ili drugu mržnju ili netrpeljivost;

b) nastupi stvarna i direktna opasnost od nasilja ili drugih oblika narušavanja javnog reda i mira u većem obimu;

c) nastupi stvarna i direktna opasnost po zdravlje učesnika ili drugih lica;

d) redari ne mogu održati red i mir na javnoj priredbi.

(3) Rukovodilac javne priredbe dužan je učesnicima saopštiti da je javna priredba prekinuta i zatražiti da se mirno razidu.

Član 16.

(Zabrana nošenja oružja, alkoholnih pića i predmeta pogodnih za nanošenje povreda)

Svim učesnicima javne priredbe zabranjeno je nositi oružje, alkoholna pića i predmete pogodne za nanošenje povreda.

Član 17.

(Odgovornost za štetu)

Pored odgovornosti organizatora za štetu propisanu zakonom kojim su uređeni obligacioni odnosi, organizator odgovara i za štetu počinjenu od strane učesnika javne priredbe na objektima ili prostoru po pravilima objektivne odgovornosti.

Član 18.

(Troškovi za dodatne mjere osiguranja)

(1) Organizator je dužan snositi troškove dodatnih mjera osiguranja, koje će nadležni organ poduzeti u svrhu osiguranja javnog reda i mira izvan svoje redovne djelatnosti.

(2) O snošenju troškova iz stava (1) ovog člana između organizatora i nadležnog organa zaključuje se ugovor najkasnije četrdeset osam sati prije početka javne priredbe.

(3) Ministar Ministarstva unutrašnjih poslova će u roku od 90 dana od dana stupanja na snagu ovog Zakona, donijeti propis o vrsti i cijeni usluga dodatnog angažovanja policijskih službenika i drugih usluga, kao i načinu plaćanja troškova iz stava (1) ovog člana.

DIO TREĆI - DRUGI OBLIK OKUPLJANJA

Član 19.

(Prijava drugog oblika okupljanja)

(1) Drugi oblik okupljanja se ne prijavljuje.

(2) Izuzetno od odredbe stava (1) ovog člana, organizator je dužan prijaviti i drugi oblik okupljanja ako karakter ili očekivani broj učesnika drugog oblika okupljanja zahtjeva poduzimanje mjera sigurnosti iz nadležnosti policije.

(3) Prijava drugog oblika okupljanja iz stava (2) ovog člana podnosi se u skladu sa članom 7. ovog Zakona, najkasnije pet dana prije početka održavanja.

Član 20.

(Primjena odredbi Zakona na drugi oblik okupljanja)

Odredbe člana 6. do 18. ovog Zakona se primjenjuju na drugi oblik okupljanja u slučaju iz člana 19. stav (2) ovog Zakona.

DIO ČETVRTI - KAZNE NE ODREDBE

Član 21

(Novčane kazne za organizatora)

(1) Novčanom kaznom od 3.000,00 KM do 9.000,00 KM kaznit će se pravno lice, organizator javne priredbe, ako:

a) održi javnu priredbu bez prethodno podnesene prijave (član 7. stav (1) i član 20.)

b) ne postupi po nalogu nadležnog organa (član 8. stav (2) i član 20.);

c) održi javnu priredbu koja je rješenjem nadležnog organa zabranjena (član 9. stav (1) i člana 20.);

d) ne odredi rukovodioca javne priredbe, ili ne osigura red i mir, odnosno dovoljan broj redara na javnoj priredbi, ili ne poduzme odgovarajuće mjere medicinske zaštite i zaštite od požara, ili ne omogući neometan prolazak vozilima policije, hitne pomoći i vatrogasnim vozilima (člana 11. stav (1) i član 20.).

(2) Novčanom kaznom od 500,00 KM do 1.500KM kaznit će se za prekršaj iz stava (1) ovog člana odgovorno lice organizatora javne priredbe.

(3) Novčanom kaznom od 500,00 KM do 1.500,00 KM kaznit će se za prekršaj iz stava (1) ovog člana fizičko lice, organizator.

Član 22.

(Novčane kazne za rukovodioca javne priredbe)

Novčanom kaznom od 500,00 KM do 1.500,00 KM kaznit će se rukovodilac javne priredbe, ako ne poduzme potrebne mjere za osiguranje reda i mira na javnoj priredbi ili ne prekine javnu priredbu kada nastupi stvarna opasnost za sigurnost učesnika javne priredbe i imovinu (član 12. stav (1) i član 20.).

Član 23.

(Novčana kazna za redara)

Novčanom kaznom od 200-600 KM kaznit će se redar, ako postupuje suprotno dužnostima iz člana 13. ovog Zakona (član 13. i član 20.).

Član 24.

(Novčana kazna za učesnike javne priredbe)

Novčanom kaznom od 200-600 KM kaznit će se učesnik javne priredbe, ako nosi oružje ili predmete pogodne za nanošenje povreda ili alkoholna pića za vrijeme učestvovanja u javnoj priredbi (član 16. i član 20.).

DIO PETI - PRELAZNE I ZAVRŠNE ODREDBE

Član 25.

(Započeti postupci)

Svi postupci koji do dana stupanja na snagu nisu pravosnažno okončani, završit će se po odredbama propisa koji je bio na snazi u vrijeme pokretanja postupka.

Član 26.

(Stavljanje van snage ranijeg Zakona)

Stupanjem na snagu ovog zakona stavlja se van snage Zakon o javnom okupljanju ("Službene novine Tuzlanskog kantona, broj: 1/12 i 11/15).

Član 27.

(Stupanje na snagu)

Ovaj Zakon stupa na snagu osmog dana od dana objavljivanja u Službenim novinama Tuzlanskog kantona.

Bosna i Hercegovina
Federacija Bosne i Hercegovine
TUZLANSKI KANTON

SKUPŠTINA

Broj: _____/24
Tuzla, _____ 2024.godine

Predsjednik
Skupštine Tuzlanskog kantona

Žarko Vujović

O B R A Z L O Ž E N J E

I. PRAVNI OSNOV

Pravni osnov za donošenje Zakona o javnim priredbama sadržan je u odredbi člana 24. stav (1) tačka c) Ustava Tuzlanskog kantona („Službene novine Tuzlansko-podrinjskog kantona“, broj: 7/97 i 3/99 i „Službene novine Tuzlanskog kantona“, broj: 13/99, 10/00, 14/02, 6/04, 10/04, 05/11 i 02/12) kojim je utvrđeno da Skupština donosi zakone i druge propise neophodne za izvršavanje nadležnosti kantona.

II. RAZLOZI ZA DONOŠENJE ZAKONA

Revizijom postojećeg zakonodavnog okvira utvrđeno je da odredbe važećeg Zakona o javnom okupljanju u Tuzlanskom kantonu, kojim se uređuje pravo i način organiziranja javnog okupljanja građana na području Tuzlanskog kantona, nisu usklađene sa međunarodnim standardima, zbog čega je potrebno izraditi nove zakone i to Zakon o mirnom okupljanju i Zakon o javnim priredbama, koji će biti usklađeni s međunarodnim standardima iz oblasti ljudskih prava, uključujući i ona koja se odnose na uživanje slobode mirnog okupljanja.

Ustavom Bosne i Hercegovine, garantuje se zaštita ljudskih prava i osnovnih sloboda. Prava i slobode koje određuje Evropska konvencija za zaštitu ljudskih prava i osnovnih sloboda i njeni protokoli primjenjuju se direktno u Bosni i Hercegovini i te odredbe imaju prioritet. Dakle, Evropska konvencija direktno je primjenjiva i ima supremaciju nad svim drugim zakonima.

S obzirom da važeći Zakon o javnom okupljanju kao javna okupljanja navodi i javne priredbe, iako su one komercijalnog karaktera u odnosu na mirna okupljanja, te samim tim nužno podliježu različitim ograničenjima i nije prihvatljivo da budu u sklopu istog zakona, a što je i jedna od preporuka Misije OSCE-a u BiH, neophodno je bilo sačiniti poseban nacrt zakona. Slična rješenja prihvaćena su i u drugim kantonima.

S ciljem usklađivanja propisa sa standardima EU, Uprava policije je sačinila nacrt teksta Zakona o javnim priredbama.

III. OBRAZLOŽENJE PREDLOŽENIH ČLANOVA

Nacrt zakona je podijeljen na 5 dijelova i sadrži 27 članova.

Dio prvi - Opće odredbe (članovi od 1. do 4.). U ovom dijelu zakona propisan je predmet regulisanja, definisani su pojmovi koji se koriste u Zakonu, supsidijarna primjena Zakona o upravnom postupku i ravnopravnost spolova. U ovom dijelu definisano je šta se podrazumijeva pod “blizinom objektima”, “naročito opravdani razlozi” čime se precizira korištenje ovih termina u zakonu, a što je postojećim važećim zakonom nedorečeno i ostavlja mogućnost za različita postupanja.

Drugi dio podijeljen je na 4 poglavlja.

U prvom poglavlju (članovi od 5. do 6.) definisan je pojam javne priredbe a koji je proširen u odnosu na važeći zakon uvjetovanjem njenog postojanja potrebom za poduzimanjem dodatnih mjera. U ovom poglavlju je detaljnije konkretizovan prostor za održavanje javne priredbe i mjesta na kojima se javna priredba ne može održati.

U drugom poglavlju (članovi od 7. do 10.) propisana je obaveza organizatora da prijavi javnu priredbu. Dakle, zadržava se termin prijava kao i u važećem zakonu u odnosu na obavijest koji se koristi u nacrtu Zakona o mirnom okupljanju. Nadalje, propisan je i rok za izdavanje odobrenja ukoliko se javna priredba održava na putu. Također, propisana je obaveza donošenja podzakonskog propisa kojim će se regulisati rješavanje i donošenje rješenja o zabrani održavanja javnih priredbi. U ovom poglavlju navedena je i mogućnost policijske stanice da zahtjeva dodatne mjere osiguranja ukoliko na osnovu procjene nisu ispunjeni uslovi za sigurno održavanje javne priredbe, te razlozi zbog kojih se može zabraniti održavanje javne priredbe. U tom smislu propisan je i žalbeni postupak te mogućnost pokretanja upravnog spora kod nadležnog Kantonalnog suda u Tuzli.

U trećem poglavlju (članovi od 11. do 14.) propisane su obaveze organizatora javnih priredbi, rukovodioca javnih priredbi, redara i policijskih službenika prilikom održavanja javnih priredbi.

U četvrtom poglavlju (članovi od 15. do 18.) propisano je sprečavanje i prekidanje održavanja javne priredbe, te zabrane nošenja oružja, alkoholnih pića i predmeta pogodnih za nanošenje povreda, zatim odgovornost za štetu i dodatne mjere osiguranja. Također propisana je obaveza ministarstva da u roku od 90 dana donese propis o vrsti i cijeni usluga dodatnog angažovanja policijskih službenika i drugih usluga kao i načinu plaćanja troškova dodatnih mjera osiguranja.

U trećem dijelu (članovi od 19. do 20.) normirana su “druga okupljanja” a koja su i prilikom definisanja propisana kao ona koja nisu regulisana Zakonom o mirnom okupljanju. Takva okupljanja se ne prijavljuju uz propisani izuzetak.

U četvrtom dijelu (članovi od 21. do 24.) propisane su kaznene odredbe za one koji postupaju suprotno odredbama ovog Zakona.

U petom dijelu (članovi od 25. do 27.) propisane su prelazne i završne odredbe kojima se između ostalog van snage stavlja važeći Zakon o javnom okupljanju, te način postupanja po već započetim postupcima.

IV. OPIS KONSULTACIJA VOĐENIH PRILIKOM IZRADE ZAKONA

Predloženi tekst nacrtu Zakona je dostavljen Misiji OSCE-a na uvid i razmatranje i dostavljanje mišljenja.

V. USKLAĐENOST PROPISA SA EVROPSKIM ZAKONODAVSTVOM

Od strane Uprave policije MUP-a TK prilikom izrade nacrtu ovog zakona nastojalo se u najvećoj mogućoj mjeri približiti standardima koje zagovara EU kada je u pitanju sloboda okupljanja.

VI. FINANSIJSKO OBRAZLOŽENJE

Za navedeni propis od strane Sektora za materijalno-finansijske i opće poslove Uprave policije izrađena je fiskalna procjenu uticaja propisa na budžet Kantona.